

АКАФИСТ ПРЕПОДОБНОМУ ОНУФРИЮ, ВЕЛИКОМУ ПУСТЫННОЖИТЕЛЮ, ЦАРЕВИЧУ ПЕРСКОМУ

Кондак 1

Избранный и дивный отче Онуфрие, сияющий трисияннаго живота зарею, ты мя, омраченнаго греховными страстьми, просвети, от смертоносная раны исхити и твоими молитвами от всех бед избави, да зову тебе: Радуйся, отче Онуфрие, пресветлый светильниче всея вселенная.

Икос 1

Ангельстии чини твоим, отче, удивишася подвигом, имиже в пустыни непрестанно упражнялся еси; три бо и шестьдесят лет постился еси, Божественная же Христовы Тайны от рук ангельских приимати сподобился еси, и ныне убо почитая тя единосельника и собеседника Ангелов, сицевая вопию тебе, святе Онуфрие: Радуйся, Ангелов предивное чудо; Радуйся, душетленных страстей разрушителю. Радуйся, непроходимая пустыни просветителю; Радуйся, воздержания наказателю и учителю. Радуйся, пустынножителей удобрение; Радуйся, монахов богодухновенное светило. Радуйся, угодниче Христов преизящный; Радуйся, безмолвия рачителю теплейший. Радуйся, бесовския силы крепкое попрание; Радуйся, спасения истинный наставниче. Радуйся, подателю радости верным; Радуйся, скорый помощниче к тебе притекающим. Радуйся, отче Онуфрие, пресветлый светильниче всея вселенная.

Кондак 2

Видяще странный и чудный жития твоего образ преподобный Пафнутий вельми удивися; тем же и аз, размышляя твоя паче меры трудолюбная пустынная подвиги, пою Богу, на сия те бе укрепившему: Аллилуиа.

Икос 2

Разуму датися мне божественному, помолися преподобне Онуфрие, ты бо, божественным сияючи светом и с Ангелы водворяющися пособствуеши память твою совершающим и радостно похвальная тебе сице приносящим: Радуйся, странно добродетельми просиявый; Радуйся, солнечнаго света светлейший. Радуйся, Ангелом в пустыню проводимый; Радуйся, горлице пустыннолюбная. Радуйся, рожо багрянноцветущая; Радуйся, храме всечестный и Богу освященный. Радуйся, Божиих дарований исполнение; Радуйся, пречудное в человецех удивление. Радуйся, бесов страшное и грозное устрашение; Радуйся, предрагий алмаманте. Радуйся, Троичнаго света зрителю; Радуйся, теплый в молитвах предстателю. Радуйся, отче Онуфрие, пресветлый светильниче всея вселенная.

Кондак 3

Сила Вышняго от ложесн матерних осени ты, преподобне Онуфрие, и пока-
за селение и жилище Святаго Духа, Егоже и аз недостойный усердно прияти
желающе, пою песнь Богу: Аллилуиа.

Икос 3

Имуще ты велика, отче, заступника и скорого в напастех помощника, раз-
личными одержимии напастми ты на помощь призываем, и весело в твоей
светлой памяти торжествующе, сия тебе вопием: Радуйся, скорый послушателю
молящихся тебе с верою; Радуйся, праведнаго Судии известное умоление. Ра-
дуйся, честное Пресвятаго Духа селение; Радуйся, непорочный Пресвятыя
Троицы служителю. Радуйся, предрагий Христа Бога бисере; Радуйся, неизре-
ченная великому Пафнутию радости. Радуйся, тогожде Пафнутия наставниче и
учителю; Радуйся, скорбящих скорое утешение. Радуйся, унывающих всежела-
тельный посетителю; Радуйся, слепых врачу и хромым целителю. Радуйся, бо-
лящих здравие и недугующих врачевание; Радуйся, верных спасенное прибе-
жище. Радуйся, отче Онуфрие, пресветлый светильниче всея вселенныя.

Кондак 4

Бурю страстей многомятежнаго мира возненавидевши, отче, всех его уст-
ранился еси красот, вселився же в пустыню, преподобне, Крестителю в житии
последовал еси и пророка Илию подражал еси, ныне же вечнующую в небесных
дворех славу получивши, с небесными Богу предстоиши жители и поеши купно
с ними: Аллилуиа.

Икос 4

Светоносное солнце и златозарное светило имуще ты вернии, святе Онуф-
рие, умильно ты молим, просвети, вразуми, научи вопити тебе сице: Радуйся,
пустыни светлое озарение; Радуйся, златозарный мира светильниче. Радуйся,
Фивеов пречудная красото; Радуйся, Ливии прекрасная доброто. Радуйся, Егип-
та пресветлое украшение; Радуйся, Месопотамии превеликий наставниче. Ра-
дуйся, Иоанна Крестителя истинный и присный подражателю; Радуйся, благо-
вонный пустыни кедре. Радуйся, яко равноангельно служиши Богу; Радуйся, яко
заступавши всех, тепле ты на помощь призывающих. Радуйся, отче Онуфрие,
пресветлый светильниче всея вселенныя.

Кондак 5

Боготечную зарю увидевши ты, отче, в пустыни, великий Пафнутий тща-
тельно последова тебе, и яко учительна светильника придержася тебе, и о пус-
тынном любопытно испытав житии, егоже от тебе добре навык, умильно воспе-
ва Богу песнь: Аллилуиа.

Икос 5

Видя твое странное житие, Собор церковный, Онуфрие преподобне, с благоговением твою блаженную память велит почитать. Сего ради и аз, спасение хотя получить, с веселием почитаю и сице тебе вопию: Радуйся, пресветлая красото Церкви Христовы; Радуйся, неусыпный предстателю ищущим ходатайства твоего. Радуйся, яко к Господу всегда вопиеша за ны; Радуйся, яко тобою просветишася внутренняя пустыни. Радуйся, яко просияша добрая дела твоя, аки солнце на земли и на небеси; Радуйся, яко впери еси ум твой к Богу. Радуйся, яко обогатился еси нищетою духа; Радуйся, орле гнезда небеснаго. Радуйся, прелести бесовския, яко трость, пополающий; Радуйся, послушателю Евангелия Христова. Радуйся, мудрование плоти крепостию Божественнаго Духа смиренный; Радуйся, земный ангеле, небесный человеце. Радуйся, отче Онуфрие, пресветлый светильниче всея вселенныя.

Кондак 6

Проповеди Евангельския творца, еже не пещися о ризе или что ясти, истинна ты, Онуфрие, узре Владыка Господь и абие власы белыми, яко одеждою, одея ты чудно, и славою свыше обогатил ты еси в преставлении твоём; юже и нам от Христа получитьи моли, вопиющим Ему: Аллилуиа.

Икос 6

Возсиял еси от Египта, столпом Божественнаго света наставляем, преподобне Онуфрие, не терпяще же ты бесовстии полцы в пустыни, бежаша; от ихже наветов и нас избави молитвами твоими, вопиющих ти сице: Радуйся, прелести бесовския потребителю; Радуйся, бесов страшный прогонителю. Радуйся, главу змиеву уязвивый молитвами твоими; Радуйся, дарований Святаго Духа преисполненный. Радуйся, духи лукавствия смиренномудрием покоривый; Радуйся, яко крест твой на раме понесл еси. Радуйся, яко тем амалика мысленнаго силу низложил еси; Радуйся, яко бремя легкое Христово восприял еси на рамо. Радуйся, яко от юности возлюбил еси иго Христово; Радуйся, яко спасен от вражиих сетей, благодарственно Богу вопиеша. Радуйся, яко и верным на враги тощно пособствуеша; Радуйся, яко тепле к тебе притекающих треволения страстей изменяеша. Радуйся, отче Онуфрие, пресветлый светильниче всея вселенныя.

Кондак 7

Изшедшу Пафнутию от обители во внутренняя пустыни, еже видети Господеву работающа, Божиим смотрением узре ты странным образом и ужасеся; по глаголании же твоём к нему, познав ты быти человека, верне и дивно Богу работающа, возгласи: Аллилуиа.

Икос 7

Новый воистинну победоносец на плотския страсти явился еси, преподобне, и кто доволен воспети борения твоя? Кто изочтет труды, болезни и подвиги, в нихже течение постничества совершил еси? К сих же похвалению недовольни суще, любовию паче почитаем тя и верно тебе сицевая вопием: Радуйся, гладом и жаждою плоть твою удручивый; Радуйся, тмы предстателя всеконечно победивый. Радуйся, яко всяко сладострастие всенощными бдении увядил еси; Радуйся, яко законно в молитвах и пощениях претерпевая, в безстрастие облеклся еси. Радуйся, предивное воздержания зеркало; Радуйся, преподобных лику великая славо. Радуйся, яко мразом померзаемей плоти твоей, теплотою любве Христовы согревашеся дух твой; Радуйся, яко зноем опаляема ты роса Божественныя благодати прохлаждаше, преподобне. Радуйся, пустыни лепое украшение; Радуйся, подвигов и совершенства образе. Радуйся, яко всяку добродетель в тебе изобразил еси; Радуйся, яко вселюбимый подвигоположнику Христу угодник показался еси. Радуйся, отче Онуфрие, пресветлый светильниче всея вселенныя.

Кондак 8

Странное твое житие бысть, Онуфрие: взирая бо на возрастшаго при пещере твоей финика, воздержанием паче питался еси. Сего ради, улучив вышнюю трапезу, поеши Богу: Аллилуиа.

Икос 8

Весь был еси в вышних и горе оком твоея души взирал еси непрестанно во всем странном постничестве твоем, ныне же дерзновение стяжав к Богу, преподобне, заступаеши всех, на помощь тя призывающих и вопиющих ти сице: Радуйся, пустынножителю великий; Радуйся, аки звезда, в пустынях просиявый. Радуйся, подражавый стопам Христовым от младенства твоего; Радуйся, ангельскаго жития ревнителю. Радуйся, наветов невидимых враг прогонителю; Радуйся, воздержания чуднаго показателю. Радуйся, совершенства преизящный учителю; Радуйся, странный и дивный к небеси путь показавый. Радуйся, яко равноангельно на земли пожил еси; Радуйся, яко равноангельную славу и честь достойно получил еси. Радуйся, яко в небесных дворех ныне о всех мольбы Творцу приносиши; Радуйся, яко тебе ходатая стяжавшим великия благодати Божия испрошаеши. Радуйся, отче Онуфрие, пресветлый светильниче всея вселенныя.

Кондак 9

Всякое естество удивися тебе, Онуфрие святе: мира бо красная от сердца возненавидев и единого Бога от души возлюбив, пустыню постил еси. Идеже в единех токмо видениях упражняеся, явился еси яко Ангел, с плотию живый, поя Богу: Аллилуиа.

Икос 9

Витийстии языцы восхвалити тя по достоянию не могут, отче богомудре Онуфрие: ты бо от утробы матерны Богу приближив твой смысл, весма прилежал еси Царю Вседержителю, плоды достойны принося Ему от твоих подвигов во всем житии, преподобне. Аз убо от Церкви Божия славима тя о тех уведев, верно тебе сицевая вопию: Радуйся, от младенства монашескому обучению вдовый; Радуйся, в юности Божиим наставлением в пустынное безхрамие введенный. Радуйся, яко Христовым словесем последуя, мира, отечества же и рода отрелся еси; Радуйся, яко крест твой евангельски на раме твоим понесл еси. Радуйся, небрегий о ризе, да нетления ризу себе самому соделаеши; Радуйся, сеявый слезами, да с радостью рукояти твоя пожнеши. Радуйся, яко неядением, нуждною нищетою и всегдашним на молитве стоянием плоть изнурил еси; Радуйся, яко пути жестоки за словеса устен Господа твоего сохранил еси. Радуйся, подвиги твоими страсти телесныя до конца умертвивый; Радуйся, равноангельную чистоту сохранивый. Радуйся, яко многолетне аки безплотен пожил еси; Радуйся, яко от Венцеподателя безплотным ликом ныне счислился еси. Радуйся, отче Онуфрие, пресветлый светильниче всея вселенныя.

Кондак 10

Спастися хотяще вернии от напастей различных, отче, предстателя ты себе и поборника поставляют и не лишаются надежд своих: ты бо молитвами к Богу твоими от бед лютых и скорбей, одержащих ны, и многоразличных злых изымаеши, наставляеши же на спасения стези усердно к тебе притекающия и Богу верно вопиющия: Аллилуиа.

Икос 10

Стену тя, заступника и молитвенника тепла обрет, преподобне, из глубины сердца, яко благоуханное кадило, с воздыханием Богу возсылаю хвалу; тебе же, присному сушу молитвеннику, сицевая приношу пения: Радуйся, плодов добродетельных благопроцветшая ниво; Радуйся, благочестия преизрядное удобрение. Радуйся, земным заступниче крепкий; Радуйся, послушателю притекающим к тебе теплый. Радуйся, светильниче, демонский мрак отревая; Радуйся, душетленных недугов тму отгоняй. Радуйся, яко заблуждающих преподобными нравами на путь правый руководиши; Радуйся, яко к исполнению Божиих хотений управляеши. Радуйся, яко много-различная благодеяния тобою свыше подаема бывают; Радуйся, яко духов злобных наветы от призывающих тя бегают. Радуйся, яко всех моления дерзновенно Вышнему приносиши; Радуйся, яко всех в нуждах и печалех защищаеши. Радуйся, отче Онуфрие, пресветлый светильниче всея вселенныя.

Кондак 11

Дение ангельское слышашеся в божественном преставлении твоём, отче, святей бо и богоугоднейшей души твоей, в небесная селения преславно восходящей, силы небесныя дивляхуся, поюще: Аллилуиа.

Икос 11

Светло по преставлении лице твое виде, отче, Пафнутий святыи удивися. Разделив же на две части рясую твою, покрыви мощи твоя и погребе тя со лвыи честно. Сия и аз духом благоговейно почитая, сице ти вопию: Радуйся, яко всего тебе Богу освятил еси; Радуйся, яко добре Божественныя законы соблюл еси. Радуйся, изшествие твое от жития пророчески предведевый; Радуйся, в теплей к Богу любви и благоговении многотрудныя твоя подвиги окончивый. Радуйся, в преставлении благоуханием чудным, аки райским, почтенный; Радуйся, молнии тогда и блистании дивно прославленный. Радуйся, егоже мощи ангельстии лица с пением, кадилы и свещами окружиша; Радуйся, емуже горняя силы врата райския отверзоша. Радуйся, яко в томже часе сияние велие, облиставшее тя, зряшеся; Радуйся, яко сладкий глас, к восприятию вечных благ призывающ тя, слышашеся. Радуйся, яко святую твою душу венцедавец Христос славно прият в горняя селения; Радуйся, яко ныне вечнаго изобильно наслаждаешия веселия. Радуйся, отче Онуфрие, пресветлый светильниче всея вселенныя.

Кондак 12

Благодать, данную ти, и подвиги твоя никтоже от земных изрещи может, отче Онуфрие: в пустыни бо нестяжательно живый, пищу имел еси хлеб ангельский, от человек бегая, с Богом и Ангелы беседовал еси. Сего ради в небесных чертозех радуешися и поеши песнь: Аллилуиа.

Икос 12

Поем доблественныя подвиги твоя, ублажаем достохвальную кончину, почитаем и священную память твою, преподобне, в нейже и яко единому тебе от двадесяти четырех старец, окружающих Престол Вышняго, предстоящему похвальная сице вопием: Радуйся, странно на земли поживый; Радуйся, странную и кончину наследивый. Радуйся, яко светлыми подвиги твоими к свету невечернему вшел еси; Радуйся, яко премирное наследие богато стяжал еси. Радуйся, неизреченных благ наследниче; Радуйся, преподобных и праведных собеседниче. Радуйся, яко ныне разрешимся зеркалом Троицу Святую зриши непосредственно; Радуйся, яко в памяти твоей Церковь Христову веселиши неизреченно. Радуйся, яко тобою постницы и пустынножители в подвиг укрепляются; Радуйся, яко вернии ходатайством твоим всех благ свыше сподобляются. Радуйся, отче Онуфрие, пресветлый светильниче всея вселенныя.

Кондак 13

О всехвальный и предивный угодниче Христов отче Онуфрие, молютися и вопию всеусердно: приими сие малое, от мене приносимое моление и потщися скоро умолити милостиваго Бога и Владыку, да избавит мя от всяких бед и будущия измет муки, вопиющаго: Аллилуиа.

(Этот кондак читается трижды, затем икос 1 и кондак 1)